

**BERITA ONLINE
ASTRO AWANI
TARIKH : 3 OKTOBER 2021 (AHAD)**



Tiada keperluan untuk terus buka PPV mega - Khairy

Ridauddin Daud

Oktober 3, 2021 22:52 MYT



Khairy berterima kasih kepada semua petugas dan sukarelawan yang berkhidmat di PPV WTCKL yang disifatkan memainkan peranan penting melawan COVID-19. - Gambar/ Astro AWANI

KUALA LUMPUR: Malaysia tidak lagi memerlukan Pusat Pemberian Vaksin (PPV) mega yang melibatkan kos operasi tinggi selepas kebanyakan rakyat kini sudah menerima vaksinasi, kata Menteri Kesihatan, Khairy Jamaluddin.

"PPV yang mega ini sudahpun mencapai matlamat dan hari ini kita tutup PPV yang paling banyak memberikan vaksinasi di Malaysia," katanya.

Mengenai PPV lain, Khairy berkata, penutupan akan dilakukan berperingkat mengikut keperluan di sesebuah kawasan.

"Jadi bila kita puas hati satu kawasan itu sudah mencapai liputan yang agak baik, kita akan mula tutup PPV.

"Namun demikian esok (Isnin) saya akan bermesyuarat dengan KKM (Kementerian Kesihatan Malaysia) dan MOSTI (Kementerian Sains, Teknologi dan Inovasi) untuk membincangkan supaya ada beberapa PPV yang masih dibuka (bagi mereka yang samada tercicir ataupun warga asing)," katanya.

Beliau berkata demikian pada sidang media selepas menutup PPV AstraZeneca pertama di Malaysia, PPV World Trade Centre Kuala Lumpur (WTCKL) pada Ahad.

Turut hadir mengiringi beliau adalah Pengarah Eksekutif Kumpulan WTCKL, Datuk Seri Dr Irmohizam Ibrahim.

PPV WTCKL yang mula beroperasi pada 5 Mei lepas itu menutup tirainya hari ini dengan lebih 1.2 juta dos vaksin telah diberikan sepanjang 150 hari beroperasi.

Dalam pada itu, Khairy dalam ucapannya sebelum itu berterima kasih kepada semua petugas dan sukarelawan yang berkhidmat di PPV tersebut.

"Dari segi vaksinasi paling banyak dalam mana-mana PPV, WTC adalah yang paling banyak. Kalau anda semua fikir apa yang anda buat tiada impak, hari ini kita lihat kes 9,000 lebih sehari.

"Daripada kemuncaknya masa saya baru dilantik, ada 23,000 kes. Paling istimewa sekali di Lembah Klang, angka jangkitan sudah mula menurun dengan sangat mendadak.

"Ini sebab anda semua. Apa yang anda buat selamatkan nyawa," ujarinya yang kemudian mendapat tepukan gemuruh daripada petugas di PPV WTCKL.

Dalam majlis ringkas namun meriah itu, Khairy turut melakukan gimik menutup pintu dewan sebagai simbolik berakhirnya proses vaksinasi di PPV WTCKL.